



**შპს „ანაგი ქონსტრაქშენის“ (ს/ნ 404631733) მიერ შპს „აი-სი-ი“-ის (ს/ნ 400017245)
50%-იანი წილის შეძენის გზით განსახორციელებელი კონცენტრაციის
კონკურენტულ გარემოსთან თავსებადობის შესახებ**

„კონკურენციის შესახებ“ საქართველოს მე-11 მუხლის მე-3 და მე-6 პუნქტების, 11¹ მუხლის მე-6 პუნქტის „ა“ ქვეპუნქტის, 17¹ მუხლის მე-4 პუნქტის, „კონცენტრაციის თაობაზე შეტყობინების წარდგენისა და განხილვის წესის დამტკიცების თაობაზე“ კონკურენციის სააგენტოს თავმჯდომარის 2020 წლის 26 ოქტომბრის N39 ბრძანებით დამტკიცებული წესის მე-8 მუხლის მე-6 პუნქტის „ა“ ქვეპუნქტის, მე-8¹ მუხლის, მე-16 მუხლის, „საჯარო სამართლის იურიდიული პირის - საქართველოს კონკურენციისა და მომხმარებლის დაცვის სააგენტოს დებულების დამტკიცების შესახებ“ საქართველოს მთავრობის 2014 წლის 14 აპრილის №288 დადგენილებით დამტკიცებული დებულების მე-4 მუხლის მე-4 პუნქტის „ე“ ქვეპუნქტის შესაბამისად,

ვბრძანებ:

1. დამტკიცდეს გადაწყვეტილება შპს „ანაგი ქონსტრაქშენის“ (ს/ნ 404631733) მიერ შპს „აი-სი-ი“-ის (ს/ნ 400017245) 50%-იანი წილის შეძენის გზით განსახორციელებელი კონცენტრაციის კონკურენტულ გარემოსთან თავსებადობის შესახებ თანდართული სახით;
2. შპს „ანაგი ქონსტრაქშენის“ მიერ შპს „აი-სი-ი“-ის 50%-იანი წილის შეძენის გზით განსახორციელებელი კონცენტრაცია მიჩნეულ იქნეს კონკურენტულ გარემოსთან თავსებადად;
3. გადაწყვეტილება გაეგზავნოს საქართველოს კონკურენციისა და მომხმარებლის დაცვის სააგენტოში შეტყობინების წარმომდგენ პირს;
4. გადაწყვეტილება მისი მიღებიდან 7 სამუშაო დღის ვადაში გამოქვეყნდეს სააგენტოს ოფიციალურ ვებ-გვერდზე, სახელმწიფო, კომერციულ, პროფესიულ, პერსონალურ ან/და საგადასახადო საიდუმლოებას მიკუთვნებული ინფორმაციის კონფიდენციალურობის დაცვით;
5. ამ ბრძანების გასაჩივრება შესაძლებელია საქართველოს კანონმდებლობით დადგენილი წესით წინამდებარე აქტის ოფიციალური წესით გაცნობის დღიდან ერთი თვის ვადაში




თბილისის საქალაქო სასამართლოში (მის.: ქ. თბილისი, დავით აღმაშენებლის ხეივანი №64);

6. ეს ბრძანება ამოქმედდეს ხელმოწერისთანავე.

ირაკლი ლეჟვინაძე

თავმჯდომარე

A handwritten signature in blue ink, consisting of a vertical line on the left, a loop on the right, and several horizontal strokes at the bottom.

გადაწყვეტილება

შპს „ანაგი კონსტრაქშენის“ (ს/ნ 404631733) მიერ შპს „აი-სი-ი“-ის (ს/ნ 400017245) 50%-იანი წილის შეძენის გზით განსახორციელებელი კონცენტრაციის კონკურენტულ გარემოსთან თავსებადობის შესახებ

I. ფაქტობრივი გარემოებები

საქართველოს კონკურენციისა და მომხმარებლის დაცვის სააგენტოში (შემდგომში - სააგენტო) 2025 წლის 25 დეკემბრის N01/8054 წერილით შემოვიდა შეტყობინება შპს „ანაგი კონსტრაქშენის“ (ს/ნ 404631733) და შპს „აი-სი-ი“-ის (ს/ნ 400017245) შორის განსახორციელებელი კონცენტრაციის თაობაზე. სააგენტოში წარმოდგენილი შეტყობინება ცნობილ იქნა დასაშვებად და 2025 წლის 31 დეკემბრის კორესპონდენციით მხარის მიერ სააგენტოში წარმოდგენილ იქნა შეტყობინების განხილვისათვის დადგენილი საფასურის გადახდის დამადასტურებელი დოკუმენტი.¹

შეტყობინება მოიცავდა დადგენილი ფორმით მოთხოვნილ ინფორმაციას კონცენტრაციის შესახებ:

- ზოგადი მონაცემები კონცენტრაციაში მონაწილე პირთა შესახებ;
- ზოგადი ინფორმაცია კონცენტრაციის შესახებ - მისი ფორმა, მიზანი;
- კონცენტრაციის მხარეებთან დაკავშირებული პირები, მათი ერთობლივი შემოსავლები 2024 წელს;
- კონცენტრაციის აღწერა - მხარის მოსაზრება შესაბამის ბაზართან დაკავშირებით, უახლოესი 24 თვის ეკონომიკური და ბიზნესგეგმები, კონცენტრაციის სავარაუდო შედეგები, კონცენტრაციის მოსალოდნელი შედეგების აღწერა, მოლოდინები კონცენტრაციის დადებითი და უარყოფითი ზეგავლენის შესახებ. ასევე, საკითხები, რამაც მხარეთა მოსაზრებით შეიძლება გავლენა იქონიოს საკითხის დადებითად ან უარყოფითად გადაწყვეტაზე და რაზეც სააგენტოს მიერ ყურადღება უნდა იქნეს გამახვილებული.

შეტყობინებას დანართის სახით თან ახლდა:

- ინფორმაცია კონცენტრაციაში მონაწილე მხარეებისა და მათი მაკონტროლებელი პირების მფლობელობაში არსებული კომპანიების შესახებ;
- ინფორმაცია კონცენტრაციაში მონაწილე მხარეების მიერ უკანასკნელი ფინანსური წლის განმავლობაში წარმოებული, შეძენილი და რეალიზებული ძირითადი საქონლის/მომსახურების შესახებ;
- ინფორმაცია უკანასკნელი ფინანსური წლის განმავლობაში კონცენტრაციაში მონაწილე მხარეების ძირითადი მიმწოდებლებისა და შემსყიდველების/მომხმარებლების შესახებ.

¹ 2025 წლის 31 დეკემბრის წერილი რეგ. N 01/8191.

ინფორმაცია კონცენტრაციაში მონაწილე ეკონომიკური აგენტების შესახებ:

არსებული მონაცემებით, შპს „ანაგი ქონსტრაქშენის“ (ს/ნ 404631733) 100%-იანი წილის მფლობელია ფ/პ ზაზა გოგოტიშვილი (პ/ნ _____).

რაც შეეხება შპს „აი-სი-ი“-ის (ს/ნ 400017245), მისი 50-50%-იანი წილების მფლობელი პარტნიორები არიან ფ/პ გიორგი ბახტაძე (პ/ნ _____) და ფ/პ პაატა დვალიშვილი (პ/ნ _____).

კონცენტრაციაში მონაწილე მხარეების ურთიერთდამოკიდებული ეკონომიკური აგენტები:

შპს „ანაგი ქონსტრაქშენი“ (ს/ნ 404631733) ფლობს შპს „ანაგი ინფრა კონსტრაქშენ“-ის (ს/ნ 404631813) 50%-იან წილს.

შპს „ანაგი ქონსტრაქშენის“ (ს/ნ 404631733) 100%-იანი წილის მფლობელი პარტნიორი, ფ/პ ზაზა გოგოტიშვილი (პ/ნ _____) კი ფლობს წილებს შემდეგ კომპანიებში:

- შპს „გრანდი“ (ს/ნ 204933215) – 25%-იანი წილი;
- შპს „სახალხო აფთიაქის განვითარების ფონდი“ (ს/ნ 400236703) – 20%-იანი წილი;
- შპს „ბითიყაი“ (ს/ნ 405788857) – 100%-იანი წილი;
- შპს „ანაგი ბეტონი“ (ს/ნ 245546681) – 35%-იანი წილი;
- შპს „ანაგი არტ ჰაუს“ (ს/ნ 404630716) – 100%-იანი წილი;
- შპს „დინ და პარტნიორები“ (ს/ნ 405537174) – 50%-იანი წილი;
- შპს „ეკოპლუსი21“ (ს/ნ 437076101) – 33%-იანი წილი;
- შპს „კორპორაცია ჯი ბი ემ“ (ს/ნ 405583569) – 50%-იანი წილი;
- შპს „ალფა 2023“ (ს/ნ 404660416) – 20%-იანი წილი;
- შპს „ანაგი ქოლაბი“ (ს/ნ 404723448) – 100%-იანი წილი;
- შპს „ხარისხი პლუსი“ (ს/ნ 406470769) – 50%-იანი წილი;
- შპს „აფთაუნ თბილისი“ (ს/ნ 404724580) – 100%-იანი წილი;
- შპს „მაჰპა კარტოგრაფიკა“ (ს/ნ 405697811) – 50%-იანი წილი.

როგორც სააგენტოში წარმოდგენილ შეტყობინებაშია მითითებული, კონცენტრაციაში მონაწილე პირებთან დაკავშირებული ეკონომიკური აგენტებიდან კონცენტრაციის შესაბამის ბაზარზე არცერთი მათგანი არ საქმიანობს.

კონცენტრაციაში მონაწილე პირები ასევე უთითებენ, რომ ბოლო 3 წლის განმავლობაში შესაბამის ბაზარზე მოქმედი ეკონომიკური აგენტებისაგან წილები არ შეუძენიათ.

კონცენტრაციის ფორმა:

განსახორციელებელი კონცენტრაციის ფორმა არის წილის შეძენის გზით ეკონომიკურ აგენტზე კონტროლის მოპოვება, კერძოდ, შპს „ანაგი ქონსტრაქშენი“ აპირებს შეიძინოს შპს „აი-სი-ი“-ის 50%-იანი წილი.

კონცენტრაციის მიზანი და გეგმა:

მხარეთა განცხადებით, შპს „ანაგი ქონსტრაქშენისთვის“ კონცენტრაციის მიზანს წარმოადგენს შპს „აი-სი-ი“-ის საქმიანობის შედეგად გამომუშავებული გასანაწილებელი მოგების (დივიდენდის) მიღება, ხოლო შპს „აი-სი-ი“-სთვის - შპს „ანაგი ქონსტრაქშენის“ მონაწილეობით ერთობლივი საწარმოსათვის საფინანსო ინსტიტუტებიდან დამატებითი საკრედიტო რესურსის მოზიდვა და ამით წარმოების კომპანიის მოგების გაზრდა.

შპს „აი-სი-ი“-ის ეკონომიკური გეგმის მიხედვით, უახლოესი 24 თვის განმავლობაში კომპანია გეგმავს

, სასაწყობე მეურნეობისა და საქმიანი ეზოების გაფართოება-მოდერნიზებას.

მხარეთა შეფასებით, კონცენტრაციის განხორციელება არ გამოიწვევს კონკურენციის შეზღუდვას შესაბამის ბაზრებზე. პირიქით, კონცენტრაციის შედეგად საქართველოს სამგზავრო ლიფტებისა და გათბობა-გაგრილების დანადგარების მიწოდება-მონტაჟის ბაზარზე გაიზრდება შეთავაზებული პროდუქციისა და სერვისების ასორტიმენტი, ასევე გაუმჯობესდება მათი ხარისხი. მხარეები მიუთითებენ, რომ კონცენტრაციის შედეგად ბაზარზე კონკურენცია არათუ შეიზღუდება, არამედ გაიზრდება კიდევ.

დამატებით, კონცენტრაცია ხელს შეუწყობს შპს „აი-სი-ი“-ის მიერ დამატებითი საკრედიტო რესურსების მოზიდვას, რომლის გამოყენებითაც კომპანია გაზრდის სარეალიზაციო პროდუქციის იმპორტსა და მარაგებს, რაც საბოლოოდ აისახება საქართველოს ბაზარზე პროდუქციის შეთავაზების ზრდაში.

შეტყობინებაში ასევე მოცემულია სამი საკითხი, რამაც მხარეთა მოსაზრებით, შესაძლოა გავლენა იქონიოს სააგენტოს მხრიდან საკითხის დადებითად გადაწყვეტაზე:

- მხარეები მიუთითებენ, რომ შესაბამისი ბაზრის გეოგრაფიულ საზღვრებში, მოქმედებს არაერთი სხვა ეკონომიკური სუბიექტი, რომლებიც ახორციელებენ მსგავსი პროდუქციისა და მომსახურების, მათ შორის სამგზავრო ლიფტებისა და გათბობა-გაგრილების დანადგარების მიწოდებას. შესაბამისად, მხარეთა შეფასებით, კონცენტრაციის განხორციელება არ გამოიწვევს კონკურენციის შეზღუდვას და მას არ ექნება უარყოფითი გავლენა შესაბამის ბაზარზე.
- ამასთანავე, მხარეები აღნიშნავენ, რომ კონცენტრაციის მონაწილე კომპანიები ოპერირებენ ბაზრის სხვადასხვა დონეზე, რის გამოც კონცენტრაცია, მათი მოსაზრებით, არ გამოიწვევს კონკურენციის შეზღუდვას შესაბამის ბაზარზე.
- კონცენტრაციის შედეგად შესაბამის ბაზარზე გაიზრდება კონკურენცია, რადგან გაიზრდება შესაბამისი პროდუქციისა და მომსახურების შეთავაზება;
- კონცენტრაციის შედეგად არ შეიცვლება შპს „ჯი-სი-ი“-ის მმართველობითი სტრუქტურა და ბაზრის დონე.

შეტყობინებაში მოცემულია შემძენის პოზიცია შესაბამის ბაზართან დაკავშირებითაც, კერძოდ, მითითებულია, რომ მხარე ბაზრის პროდუქციულ საზღვრად მიიჩნევს სამგზავრო ლიფტების მიწოდება-მონტაჟისა და გათბობა-გაგრილების დანადგარ-მოწყობილობების მიწოდება-მონტაჟის ბაზარს. შეტყობინებაში მითითებულია, რომ მხარეთა საქმიანობის

არეალიდან გამომდინარე, ბაზრის გეოგრაფიულ საზღვრად უნდა განისაზღვროს ეროვნული დონე - საქართველოს ტერიტორია.

მხარეებმა დაადასტურეს, რომ შეტყობინებაში წარმოდგენილი ინფორმაცია შეესაბამება სიმართლეს და მათთვის ცნობილია არასწორი ინფორმაციის მიწოდებით გამოწვეული და საქართველოს კანონმდებლობით განსაზღვრული სამართლებრივი შედეგები.

II. სამართლებრივი მიმოხილვა

სააგენტოსთვის წინასწარ შეტყობინებას დაქვემდებარებული კონცენტრაციის შესახებ შეტყობინების წარდგენის, განხილვისა და სააგენტოს მიერ გადაწყვეტილების მიღების მატერიალური და პროცედურული საკითხები რეგულირდება საქართველოს მოქმედი კანონმდებლობით, კერძოდ: „კონკურენციის შესახებ“ საქართველოს კანონით, საქართველოს ზოგადი ადმინისტრაციული კოდექსით, „სსიპ საქართველოს კონკურენციისა და მომხმარებლის დაცვის სააგენტოს დებულების დამტკიცების შესახებ“ საქართველოს მთავრობის 2014 წლის 14 აპრილის N288 დადგენილებით, „კონცენტრაციის თაობაზე შეტყობინების წარდგენისა და განხილვის წესის დამტკიცების თაობაზე“ კონკურენციის სააგენტოს თავმჯდომარის 2020 წლის 26 ოქტომბრის N39 ბრძანებით, „ბაზრის ანალიზის მეთოდური მითითებების დამტკიცების თაობაზე“ კონკურენციის სააგენტოს თავმჯდომარის 2020 წლის 23 ოქტომბრის N37 ბრძანებით და სხვა.

სააგენტოსათვის წინასწარ შეტყობინებას ექვემდებარება კონცენტრაცია, რომელიც ერთობლივად აკმაყოფილებს „კონკურენციის შესახებ“ საქართველოს კანონის მე-11 და 11¹ მუხლების მოთხოვნებს.

1. „კონკურენციის შესახებ“ საქართველოს კანონის მე-11 მუხლის პირველი პუნქტით განსაზღვრულია კონცენტრაციის განმარტება, ხოლო ამავე მუხლის მე-2 პუნქტით განისაზღვრება ის უფლებები, რომელიც გამოიყენება კონცენტრაციის მიზნებისთვის კონტროლის განსახორციელებლად;
2. „კონკურენციის შესახებ“ საქართველოს კანონის მე-11 მუხლის შესაბამისად, სააგენტოსთვის წინასწარ შეტყობინებას დაქვემდებარებული კონცენტრაციის განხორციელება დასაშვებია მხოლოდ მისი კონკურენტულ გარემოსთან თავსებადობის შესახებ სააგენტოს გადაწყვეტილების საფუძველზე. ხოლო ამავე კანონის 33-ე მუხლის მე-4 პუნქტის მიხედვით, სავალდებულო შეტყობინებას დაქვემდებარებული კონცენტრაციის სააგენტოს გვერდის ავლით განხორციელების შემთხვევაში, შეტყობინების წარმოდგენის ვალდებულების მქონე პირს ეკისრება ჯარიმა, რომლის ოდენობა არ აღემატება სააგენტოს მიერ გადაწყვეტილების გამოტანის წინა ფინანსური წლის ერთობლივი შემოსავლის 5%-ს. ჯარიმის დაკისრება შეტყობინების წარმოდგენის ვალდებულების მქონე პირს არ ათავისუფლებს სააგენტოსთვის შეტყობინების წარმოდგენისგან. ჯარიმის დაკისრების პარალელურად, შეტყობინების წარმოდგენის ვადას, ყოველ კონკრეტულ შემთხვევაში განსაზღვრავს სააგენტო და იგი არ შეიძლება იყოს 14 კალენდარულ დღეზე ნაკლები. სააგენტო განიხილავს კანონმდებლობის გვერდის ავლით განხორციელებულ კონცენტრაციას და იმ შემთხვევაში თუ ის მიიჩნევა დაუშვებლად, ჯარიმის დაკისრების პარალელურად მიმართავს სასამართლოს კონცენტრაციის გაუქმების და პირვანდელი მდგომარეობის აღდგენის მიზნით;

3. „კონკურენციის შესახებ“ საქართველოს კანონის 33-ე მუხლის მე-7 პუნქტის შესაბამისად, ჯარიმის ოდენობის დადგენისას გათვალისწინებული უნდა იქნეს შესაბამისი დარღვევით გამოწვეული ზიანი, დარღვევის ხანგრძლივობა და სიმძიმე. თავის მხრივ, საქართველოს კონკურენციის ეროვნული სააგენტოს თავმჯდომარის 2020 წლის 2 დეკემბრის N04/158 ბრძანებით დამტკიცებული „ჯარიმების ოდენობის დადგენის სახელმძღვანელო პრინციპების“ მიხედვით, ჯარიმის ოდენობის განსაზღვრის პროცესში სააგენტო მოქმედებს „კონკურენციის შესახებ“ საქართველოს კანონის მიზნის დასაცავად და ითვალისწინებს მხარეთა ინტერესებს. კერძოდ, უზრუნველყოფს, რომ მის მიერ გამოყენებული ჯარიმა იყოს სამართლიანი, პროპორციული და პრევენციული ხასიათის. ჯარიმის დაკისრების დროს, გასათვალისწინებელია, ქმედება განზრახ იქნა ჩადენილი თუ გაუფრთხილებლობით, პირი მოქმედებდა მოგების მიღების მიზნით, თუ საკუთარი საწარმოს რთულ ვითარებაში ჩაგდების თავიდან ასაცილებლად, ან პირველად ჩაიდინა თუ არა მან მსგავსი ქმედება და სხვა. ჯარიმის განსაზღვრის დამატებითი კრიტერიუმები ასევე მოცემულია საქართველოს ადმინისტრაციულ სამართალდარღვევათა კოდექსშიც. ჯარიმის ინდივიდუალური ოდენობის გამოთვლის დროს, მხედველობაში მიიღება პასუხისმგებლობის დამამძიმებელი და შემამსუბუქებელი გარემოებები, კანონსაწინააღმდეგო ქმედების ჩამდენი პირის ეკონომიკური მდგომარეობა;
4. „კონცენტრაციის თაობაზე შეტყობინების წარდგენისა და განხილვის წესის დამტკიცების თაობაზე“ კონკურენციის სააგენტოს თავმჯდომარის 2020 წლის 26 ოქტომბრის N39 ბრძანების მე-3 მუხლის პირველი პუნქტის მიხედვით, სააგენტოსათვის წინასწარ სავალდებულო წერილობით შეტყობინებას ექვემდებარება კონცენტრაცია, თუ მისი მონაწილე პირების ერთობლივი (ჯამური) წლიური შემოსავალი საქართველოს ტერიტორიაზე, შეტყობინების წარმოდგენის ვალდებულების წარმოშობის წინა ფინანსური წლის მდგომარეობით, აღემატება 20 მილიონ ლარს და, ამასთან, კონცენტრაციის მონაწილე მინიმუმ ორი პირიდან თითოეულის წლიური ერთობლივი შემოსავალი აღემატება 5 მილიონ ლარს;
5. „კონცენტრაციის თაობაზე შეტყობინების წარდგენისა და განხილვის წესის დამტკიცების თაობაზე“ კონკურენციის სააგენტოს თავმჯდომარის 2020 წლის 26 ოქტომბრის N39 ბრძანების მე-4 მუხლის მე-3 პუნქტის შესაბამისად, კონცენტრაციის მონაწილეთა ერთობლივი შემოსავლის გამოთვლისას მხედველობაში მიიღება შემდეგი ერთეულების ერთობლივი შემოსავალი: ა) კონცენტრაციაში მონაწილე პირი; ბ) კონცენტრაციაში მონაწილე პირთა მიერ პირდაპირ ან არაპირდაპირ კონტროლირებადი ან პირდაპირ ან არაპირდაპირ მაკონტროლებელი საწარმოები; გ) საწარმოები, რომლებიც იმყოფებიან კონცენტრაციის მონაწილე პირთა ერთობლივი კონტროლის ქვეშ.
6. სააგენტოს თავმჯდომარის 2020 წლის 26 ოქტომბრის N39 ბრძანებით დამტკიცებული წესის მე-5 მუხლის „ა“ ქვეპუნქტის მიხედვით - შექმენით, ხელშეკრულებებით ან სხვა საშუალებებით კონტროლის მოპოვების შემთხვევაში – შეტყობინების წარდგენის ვალდებულება ეკისრება(თ) შემძენ ან/და კონტროლის უფლების მომპოვებელ პირ(ებ)ს;
7. კანონის 11¹ მუხლის მე-3 პუნქტის შესაბამისად, სააგენტოს მიერ კონცენტრაციის თაობაზე შეტყობინების განხილვისათვის დაწესებული საფასური შეადგენს 5 000 ლარს;
8. კანონის 11¹ მუხლის მე-5 და მე-6 პუნქტების შესაბამისად, თუ დაგეგმილი კონცენტრაცია ექვევა კანონის რეგულირების სფეროში, სააგენტო კონცენტრაციის თაობაზე შეტყობინების განხილვას იწყებს კონცენტრაციის თაობაზე შეტყობინების განხილვის საფასურის გადახდის დამადასტურებელი დოკუმენტის წარდგენის შემდეგ და ამ დოკუმენტის

წარდგენიდან არაუგვიანეს 25 სამუშაო დღისა, ვალდებულია განიხილოს და მიიღოს ერთ-ერთი შემდეგი გადაწყვეტილება:

- ა) დაგეგმილი კონცენტრაციის კონკურენტულ გარემოსთან თავსებადობის შესახებ;
 - ბ) კონცენტრაციის თაობაზე შეტყობინების განხილვის ვადის გაგრძელების შესახებ, თუ არსებობს გონივრული ეჭვი, რომ შესაძლებელია დაგეგმილი კონცენტრაცია კონკურენტულ გარემოსთან თავსებადი არ იყოს ან თუ, საქმის სირთულიდან გამომდინარე, საჭიროა შესაბამისი საკითხის დამატებით შესწავლა. სააგენტოს მიერ აღნიშნულ ვადაში ერთ-ერთი გადაწყვეტილების მიუღებლობა დადებით პასუხად მიიჩნევა;
9. კანონის 11¹ მუხლის მე-9 პუნქტის შესაბამისად, კონცენტრაციის თაობაზე შეტყობინების განხილვის ვადის გაგრძელების შესახებ გადაწყვეტილების მიღების შემთხვევაში სააგენტო ვალდებულია კონცენტრაციის თაობაზე შეტყობინება განიხილოს კონცენტრაციის თაობაზე შეტყობინების განხილვის ვადის გაგრძელების შესახებ გადაწყვეტილების მიღებიდან არაუგვიანეს 90 კალენდარული დღისა. ამ ვადაში სააგენტოს მიერ აღნიშნულ შეტყობინებაზე პასუხის გაუცემლობა დადებით პასუხად მიიჩნევა;
 10. იმ ეკონომიკური აგენტების კონცენტრაციის რეგისტრაციისთვის, რომლებსაც ეკისრებათ ამ კანონის 11¹ მუხლით განსაზღვრული კონცენტრაციის თაობაზე შეტყობინების ვალდებულება, აუცილებელია, არსებობდეს სააგენტოს გადაწყვეტილება მოსალოდნელი კონცენტრაციის კონკურენტული ეფექტის შესახებ. სააგენტოს მიერ უარყოფითი დასკვნის გაცემა საჯარო სამართლის იურიდიული პირის – საჯარო რეესტრის ეროვნული სააგენტოს მიერ ეკონომიკური აგენტის რეგისტრაციაზე უარის თქმის საფუძველია;
 11. კანონის 11¹ მუხლის მე-6 და მე-9 პუნქტებით გათვალისწინებული ვადების ამოწურვამდე ან სააგენტოს მიერ შესაბამისი გადაწყვეტილების მიღებამდე კონცენტრაციის განხორციელება აკრძალულია. სააგენტოს მიერ უარყოფითი გადაწყვეტილების მიღების შემთხვევაში კონცენტრაციის განხორციელება აკრძალულია;
 12. კანონის მე-11 მუხლის მე-3 და მე-4 პუნქტების შესაბამისად, კონცენტრაცია, რომელიც არსებითად არ ზღუდავს ეფექტიან კონკურენციას საქართველოს ან მისი ნაწილის სსსაქონლო ან მომსახურების ბაზარზე, თავსებადია კონკურენტულ გარემოსთან. ხოლო, კონცენტრაცია, რომელიც ზღუდავს ეფექტიან კონკურენციას – არ არის თავსებადი;
 13. „კონცენტრაციის თაობაზე შეტყობინების წარდგენისა და განხილვის წესის დამტკიცების თაობაზე“ 2020 წლის 26 ოქტომბრის N39 და „ბაზრის ანალიზის მეთოდური მითითებების დამტკიცების თაობაზე“ კონკურენციის სააგენტოს თავმჯდომარის 2020 წლის 23 ოქტომბრის N37 ბრძანებებით დამტკიცებული კანონქვემდებარე აქტები განსაზღვრავს დაგეგმილი კონცენტრაციის შეფასებასთან დაკავშირებულ მნიშვნელოვან საკითხებს. კერძოდ, „კონცენტრაციის თაობაზე შეტყობინების წარდგენისა და განხილვის წესის დამტკიცების თაობაზე“ 2020 წლის 26 ოქტომბრის N39 ბრძანებით დამტკიცებული აქტით განსაზღვრულია კონცენტრაციის შეფასების პრინციპები, მეთოდები და შესაბამისი კრიტერიუმები, ხოლო „ბაზრის ანალიზის მეთოდური მითითებების დამტკიცების თაობაზე“ კონკურენციის სააგენტოს თავმჯდომარის 2020 წლის 23 ოქტომბრის N37 ბრძანებით დამტკიცებული აქტი ადგენს სასაქონლო ბაზრის შესწავლისა და შეფასებისათვის საჭირო პრინციპებსა და მეთოდებს;
 14. კანონის მე-18 მუხლის შესაბამისად, სააგენტო უფლებამოსილია ეკონომიკურ აგენტს/მხარეს/დაინტერესებულ მხარეს მოსთხოვოს მისი საქმიანობის ან/და კონკრეტული ოპერაციის შესახებ ნებისმიერი ინფორმაციის/დოკუმენტაციის (მათ შორის,

კონფიდენციალური ინფორმაციის) წარდგენა, რომელიც საჭიროა სააგენტოს მიერ შესაბამისი უფლებამოსილების განხორციელებისთვის.

III. ბაზრის ანალიზი

„ბაზრის ანალიზის მეთოდური მითითების დამტკიცების თაობაზე“ სააგენტოს თავმჯდომარის 2020 წლის 23 ოქტომბრის N37 ბრძანების მე-5 მუხლის პირველი პუნქტის მიხედვით, შესაბამისი ბაზრის იდენტიფიცირება უნდა მოხდეს შემდეგი სამი პარამეტრის მეშვეობით:

- ა) სასაქონლო/მომსახურების ბაზრის პროდუქციული საზღვრები;
- ბ) სასაქონლო/მომსახურების ბაზრის გეოგრაფიული საზღვრები;
- გ) სასაქონლო/მომსახურების ბაზრის დროითი ჩარჩოები.

ა) პროდუქციული საზღვრები

შესაბამისი ბაზრის პროდუქციულ საზღვრებში ექცევა ყველა საქონელი ან მომსახურება, რომელიც შეიძლება ჩაითვალოს ურთიერთჩანაცვლებადად ამ საქონლის/მომსახურების მახასიათებლებიდან, ფასებიდან და მათი გამოყენების მიზნებიდან გამომდინარე.²

შესაბამისად, სამიზნე ეკონომიკური აგენტის საქმიანობის სპეციფიკიდან და მისი პროდუქციის ასორტიმენტიდან გამომდინარე, განსახილველი კონცენტრაციის შეფასების მიზნებისათვის, სააგენტომ ცალ-ცალკე შეაფასა: 1) ლიფტებისა და 2) გათბობა-გაგრილების დანადგარების ბაზრები მათი შემდგომი დამატებითი ქვეკატეგორიზაციის გარეშე, ვინაიდან, სააგენტომ ლიფტებისა და გათბობა-გაგრილების დანადგარების მიწოდება-მონტაჟი არ მიიჩნია ერთ პროდუქციულ საზღვრად.

ბ) გეოგრაფიული საზღვრები

პროდუქციის გეოგრაფიული ხელმისაწვდომობის გათვალისწინებით, განსახილველი კონცენტრაციის გეოგრაფიულ საზღვრად განისაზღვრა ეროვნული დონე.

გ) დროითი ჩარჩო

ვინაიდან, პროდუქციის მიწოდება არ ხასიათდება სეზონურობით, შესაბამის ბაზარს არ გააჩნია კონკრეტული დროითი ჩარჩო.

კონცენტრაციაში მონაწილე მხარეების საბაზრო წილების გამოთვლა:

ბაზრის ანალიზის პროცესში, სააგენტო ეყრდნობა აუცილებლობისა და თანაზომიერების პრინციპებს და ბაზრის ანალიზს ახორციელებს მიზნის მისაღწევად საჭირო და პროპორციული კვლევის ჩატარების გზით.

² კონკურენციის სააგენტოს თავმჯდომარის N 37 ბრძანებით დამტკიცებული „ბაზრის ანალიზის მეთოდური მითითების დამტკიცების თაობაზე“ მე-8 მუხლის პირველი პუნქტი.

„ბაზრის ანალიზის მეთოდური მითითების დამტკიცების თაობაზე“ სააგენტოს თავმჯდომარის 2020 წლის 23 ოქტომბრის N37 ბრძანების მე-16 მუხლის მე-3 პუნქტის მიხედვით, შესაბამისი სასაქონლო ბაზრის მოცულობა შესაძლებელია განისაზღვროს ქვეყანაში წარმოებული, ქვეყნიდან ექსპორტირებული და იმპორტირებული საქონლის მოცულობების გათვალისწინებით.

ბაზრის ანალიზის ფარგლებში შესაბამისი ბაზრის მოცულობის, ჰერფინდალ-ჰირშმანის ინდექსისა და კონცენტრაციაში მონაწილე ეკონომიკური აგენტების საბაზრო წილების გამოთვლის მიზნით, სააგენტომ სსიპ შემოსავლების სამსახურიდან გამოითხოვა ინფორმაცია 2025 წელს სამგზავრო ლიფტების, ასევე გათბობა-გაგრილება-ვენტილაციის (კერძოდ, VRF და MEP სისტემების) დანადგარ-მოწყობილობებისა და მათთან დაკავშირებული აქსესუარების იმპორტის შესახებ.³ მიღებული ინფორმაციის⁴ მიხედვით დადგინდა შემდეგი:

ლიფტების იმპორტი - 2025 წელი:

- ბაზარზე მოქმედი კომპანიების რაოდენობა - **251⁵**;
- ბაზრის მოცულობა - **84 616 166.3** ლარი;
- ბაზრის კონცენტრაციის HHI ინდექსი - **475.5**;
- შპს „აი-სი-ი“-ის საბაზრო წილი - **%**

გათბობა-გაგრილების დანადგარ-მოწყობილობებისა და მათთან დაკავშირებული აქსესუარების იმპორტი - 2025 წელი:

- ბაზარზე მოქმედი კომპანიების რაოდენობა - **264⁶**;
- ბაზრის მოცულობა - **199 145 493.6** ლარი;
- ბაზრის კონცენტრაციის HHI ინდექსი - **1134.1**;
- შპს „აი-სი-ი“-ის საბაზრო წილი - **%**;
- შპს „ანაგის“ (ს/ნ 245416401) საბაზრო წილი - **%**.

როგორც ლიფტების, ასევე გათბობა-გაგრილების დანადგარ-მოწყობილობების ბაზარი იმპორტის დონეზე დაბალკონცენტრირებულია. სამიზნე კომპანიის - შპს „აი-სი-ი“-ის საბაზრო წილი ორივე შემთხვევაში მცირეა. ამასთან, გათბობა-გაგრილების დანადგარ-მოწყობილობების ბაზარზე უმნიშვნელოა ბაზრის კონცენტრაციის ინდექსის ცვლილების მაჩვენებელი (ΔHHI), ხოლო ლიფტების ბაზრის იმპორტის დონეზე კონცენტრაციის ინდექსი არ შეიცვლება.

ზემოაღნიშნულიდან გამომდინარე, ვინაიდან, კონცენტრაციების კონტროლის მიზანს წარმოადგენს პირთა მხოლოდ ისეთი კონცენტრაციის დაუშვებლობა, რომელიც არსებითად ზღუდავს ეფექტიან კონკურენციას შესაბამის ბაზარზე, ხოლო თუ დაგეგმილი კონცენტრაცია არსებითად არ ზღუდავს ეფექტიან კონკურენციას, მიიღება გადაწყვეტილება დაგეგმილი კონცენტრაციის კონკურენტულ გარემოსთან თავსებადობის შესახებ, სააგენტოს მიერ

³ სააგენტოს 2026 წლის 08 იანვრის N 02/37 წერილი.

⁴ შემოსავლების სამსახურის 2026 წლის 14 იანვრის N21-10/1776 წერილი (სააგენტოში რეგ. N01/269).

⁵ მხედველობაში იქნა მიღებული ის სუბიექტები, რომელთა პროდუქციის წლიური ჯამური საიმპორტო ღირებულება 5 000 ლარი და მეტი იყო.

⁶ მხედველობაში იქნა მიღებული ის სუბიექტები, რომელთა პროდუქციის წლიური ჯამური საიმპორტო ღირებულება 5 000 ლარი და მეტი იყო.

განხორციელებული ბაზრის ანალიზის, კონკრეტულად კი შეფასებული ბაზრების სტრუქტურის, აგრეთვე, კონცენტრაციის მონაწილე მხარეებისა და მათთან დაკავშირებული ეკონომიკური აგენტების საბაზრო წილების გათვალისწინებით, განსახორციელებული კონცენტრაცია არ მოახდენს არსებით გავლენას კონკურენტულ გარემოზე.

IV. კონკურენციისა და მომხმარებლის დაცვის სააგენტოს შეფასება

ყოველივე ზემოაღნიშნულიდან გამომდინარე, საქართველოს კონკურენციისა და მომხმარებლის დაცვის სააგენტომ დაადგინა, რომ შპს „ანაგი ქონსტრაქშენის“ (ს/ნ 404631733) მიერ შპს „აი-სი-ი“-ის (ს/ნ 400017245) 50%-იანი წილის შეძენის გზით განსახორციელებული კონცენტრაცია „კონკურენციის შესახებ“ საქართველოს კანონის მე-11 მუხლის შესაბამისად არსებითად არ ზღუდავს ეფექტიან კონკურენციას საქართველოს ან მისი ნაწილის სასაქონლო ან მომსახურების ბაზარზე და თავსებადია კონკურენტულ გარემოსთან.